

**Takornariat umiarsuarnik takornariartaatinik tikittut tulannerminni isumannaallisaanikkut akitsuuserneqarnissaannik Naalackersuisut UKA2024-mi Inatsisartunut saqqummiussassamik inatsisiliornissaat pillugu Inatsisartut aalajangiiffigisassaattut siunnersuut. Isumannaallisaanikkut akitsuutip siunertaraa inupparujussuit umiarsuarujussuarlutik tikittut tulannerminni timmisartukkut tikittutuut periuseq malillugu nalunaarsorneqartalernissaat, nunatsinnilu aningaasaqarnikkut iluanaarutigineqarsinnaalerlutik.**  
(Inatsisartunut ilaasortaq Aqqalu C. Jerimiassen, Atassut)

### **Akissuteqaat**

(Aningaasaqarnermut Naligiissitaanermullu Naalackersuisoq)

### **Aappassaaneerinnineq**

Aningaasaqarnermut Akileraartarnermullu Ataatsimiititaliaq maanna isumaliutissiissumminik saqqummiussivoq. Siullermik siunnersuut itigartinneqassasoq inassutigineqarpoq, ataatsimiititaliarlu isumaqatigiittoq allannguutissatut siunnersuummik saqqummiussivoq. Siullermik allannguutissatut siunnersuummi siunertat Naalackersuisut umiarsuit takornariartaatini ilaasunut akitsuutip nutarterneqarnissaanut siunnersuutaanni ilanngunneqarnissaannik Naalackersuisut peqquneqarput.

Ataatsimiititaliap isumannaallisaanermut akitsuut aalajangiiffigisassatut siunnersuummi taaneqartoq pillugu siunnersuutillu anguniagaanik erseqqinnerusumik oqaaseqassasoq Naalackersuisut takorusukkaluarpaat.

Siunnersuutip siullermeerneqarnerani Naalackersuisut oqaatigeriigaattut, umiarsuarni takornariartaatini ilaasut passunneqartarnerannut ullumikkut piumasaqaateqartoqareerpoq, umiarsualivilli ataasiinnaq sullissinermit taamaattumut akiliisitsisarnissamik toqqaavoq. Taamaallilluni umiarsualiviit amerlanerusut assersuutigalugu ISPS-imut akitsuummik (*"International Ship and Port Facility Security Code"*) allatulluunniit umiarsuit takornariartaatit atuisutut akiliisinneqarnerannik akiligassiisinnaanerannut aporfissaqanngilaq.

Umiarsuarni takornariartaatini ilaasut timmisartumi ilaasutulli nalunaarsorneqartarnissaat Naalackersuisut qulakkiissagaat, isumannaallisaanermut akitsuummik atulersitsinissamik siunnersuut Naalackersuisut paasivaat. Tamanna nunatta aningaasaqarneranut iluaqutsiisussatut.

Partiit tamarmik 2023-mut aningaasanut inatsit pillugu isumaqatigiissummi peqataapput. Tassani umiarsuarni takornariartaatini ilaasut akitsuusiiffigineqartarnerannut annertusaasumik Naalackersuisut siunnersuusiussasut isumaqatigiissutigineqarpoq. Suliamullu tassunga atatillugu Naalackersuisut manna sapaatip akunnerani umiarsuarni takornariartaatini ilaasunut akitsuummik atulersitseqqinnissaanut siunnersuut tusarniutigalugu nassitutissavaat, taamatullu kommunalbestyrelsit avatangiisinut iluarsartuussinermullu umiarsuarni takornariartaatini ilaasunut akitsuummik aalajangersaasinnaanermik piginnaatitsissummik imaqaasaaq. Akiliut umiarsuarni takornariartaatini ilaasut inoqarfinnut inoqarfiillu avataanni niunerannut kommunip aningaasartuutaanut matussusiisaaq. Tassani assersuutigalugu tikinnermi atortut

anartarfiillu, eqqakkanik passussinerit allallu pineqarput. Kommunalbestyrelsit piffinnik naapertuuttunik avatangiisinut iluarsartuussinermullu akiliummi siumoortumik aalajangeriikkanik akiliisitsisarnermik inernejartussanik toqqaanissaq aalajangigassaraat.

Taamaalilluni Naalackersuisut inatsisissatut siunnersuutissap nunatta aningaasaqarneranik iluaqutsiisussamik kissaateqarneq naammassisagaa, naliliutigaat.

Siunnersuutip ilaanut umiarsuarni takornariartaatini ilaasut nalunaarsorneqarnerannik imaqartumut tunngatillugu, umiarsualivinni oqartussaasut paasissutissat sumut atussaneraat Naalackersuisut nalornivaat. Naalackersuisulli siunnersuut isumaliutigissavaat, umiarsualiviillu ingerlanneqarnerat pillugu inatsisip nutarternerani ilanngussinnaassallugit.

Naggasiullugu allannguutissatut siunnersuutit saqqummiunneqartup akuerineqarnissaa Naalackersuisut sinnerlugit inassutigissavara.